

Հաստատված է
ԵՊՀ ԻՄ գիտական խորհրդի
2020թ. մայիսի 14-ի նիստի թիվ 45/3 որոշմամբ
ԵՊՀ ԻՄ գիտական խորհրդի նախագահ՝ _____Ա. Հ. Մակարյան
«14» մայիսի 2020թ.

Կ Ա Ր Գ

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆԻ ԻՋԵՎԱՆԻ ՄԱՍՆԱՃՅՈՒՂԻ ՀԵՌԱԿԱ
ՈՒՍՈՒՑՄԱՆ ՁԵՎՈՎ ՄԱԳԻՍՏՐԱՏՈՒՐԱՅԻ 2020-2021 ՈՒՍՈՒՄՆԱԿԱՆ ՏԱՐՎԱ
ԸՆԴՈՒՆԵԼՈՒԹՅԱՆ

1. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով սահմանվում են «Երևանի պետական համալսարան» հիմնադրամի Իջևանի մասնաճյուղի (այսուհետ՝ ԵՊՀ ԻՄ) հեռակա ուսուցման ձևով մագիստրատուրայի 2020-2021 ուսումնական տարվա ընդունելության կարգն ու պայմանները:

2. Սույն կարգի իրավական հիմքերն են՝ Կրթության մասին, Բարձրագույն և հետբուհական կրթության մասին ՀՀ օրենքները, ՀՀ կրթության, գիտության, մշակույթի և սպորտի նախարարի հրամանով հաստատված «ՀՀ բարձրագույն ուսումնական հաստատություններում մագիստրատուրայի ընդունելության և ուսուցման կարգը», ԵՊՀ ԻՄ կանոնադրությունը և այլ իրավական ակտերը:

3. Հեռակա ուսուցման ձևով մագիստրոսական ծրագիրը բացվում է, եթե ուսանողների թիվը համապատասխանում է «ԵՊՀ ԻՄ դասախոսական կազմի ուսումնական և ուսումնամեթոդական բեռնվածության հաշվարկի նորմերի» 1-ին կետի պահանջներին:

4. Հեռակա ուսուցման ձևով մագիստրատուրայում կրթությունը կազմակերպվում է միայն վճարովի հիմունքներով, բացառությամբ օրենքով նախատեսված դեպքերի:

2. ՄԱԳԻՍՏՐԱՏՈՒՐԱՅԻ ԸՆԴՈՒՆԵԼՈՒԹՅԱՆ ԿԱՐԳԸ ԵՎ ՊԱՅՄԱՆՆԵՐԸ

5. Հեռակա ուսուցման ձևով ԵՊՀ ԻՄ մագիստրատուրա մրցութային կարգով կարող են ընդունվել Հայաստանի Հանրապետության պետական և ըստ մասնագիտությունների հավատարմագրված (ինստիտուցիոնալ հավատարմագրում անցած) ոչ պետական բարձրագույն ուսումնական հաստատությունների բակալավրի կամ դիպլոմավորված մասնագետի որակավորում ունեցող շրջանավարտները:

6. Օտարերկրյա քաղաքացիների ընդունելությունը կատարվում է հարցազրույցով:

7. Մագիստրատուրայի ընդունելությունը կազմակերպելու նպատակով ձևավորվում է ընդունող հանձնաժողով՝ ԵՊՀ ԻՄ տնօրենի նախագահությամբ: Հանձնաժողովի կազմում ընդգրկվում են ԵՊՀ ԻՄ ուսումնամեթոդական վարչության պետը և ուսումնամեթոդական վարչության ուսումնական գործընթացի կազմակերպման և վերահսկման բաժնի վարիչը:

8. Մագիստրատուրայի ընդունելության հայտերն ուսումնասիրելու, քննությունների արդյունքներն ամփոփելու և դիմորդի ընդունելության վերաբերյալ եզրակացություն տալու նպատակով ԵՊՀ ԻՄ տնօրենի հրամանով ձևավորվում է մանդատային հանձնաժողով՝ ԵՊՀ ԻՄ ուսումնամեթոդական վարչության պետի նախագահությամբ: Հանձնաժողովի կազմում ընդգրկվում են ԵՊՀ ԻՄ ուսումնամեթոդական վարչության ուսումնական գործընթացի կազմակերպման և վերահսկման բաժնի վարիչը և հումանիտար ֆակուլտետի դեկանը:

9. Ընդունելության քննության անցկացման նպատակով ԵՊՀ ԻՄ տնօրենի հրամանով ձևավորվում է առարկայական քննական հանձնաժողով, որի կազմում ներգրավվում են հումանիտար գիտությունների ֆակուլտետի դեկանը, մագիստրոսական կրթական ծրագրի ղեկավարը և ընդունող հանձնաժողովի ներկայացուցիչը (ըստ անհրաժեշտության):

10. Հեռակա ուսուցման ձևով մագիստրատուրայի ընդունելության փաստաթղթերն ընդունվելու են ընթացիկ տարվա սեպտեմբերի 1-ից մինչև հոկտեմբերի 10-ը:

11. Մագիստրատուրայի ընդունելության համար դիմորդները պետք է ներկայացնեն հետևյալ փաստաթղթերը.

ա) դիմում ԵՊՀ ԻՄ տնօրենի անունով,

բ) բարձրագույն կրթության դիպլոմի և հավելվածի բնօրինակներն ու պատճենները,

գ) ինքնակերսագրություն,

դ) 4 հատ լուսանկար (3x4սմ չափի),

ե) զինվորական գրքույկի բնօրինակն ու պատճենը (առկայության դեպքում),

զ) անձնագրի պատճենը,

է) ընդունելության ծառայությունների համար գանձվող 1000 դրամի վճարման անդորրագիրը:

12. «Դպրոցական մանկավարժություն և մեթոդիկա» կրթական ծրագրով հեռակա ուսուցման ձևով մագիստրատուրայի ընդունելության մրցույթին հարցազրույցով՝ առանց ընդունելության քննության կարող են մասնակցել.

12. 1. ԵՊՀ ԻՄ 2020թ.կամայական մասնագիտության բակալավրի կրթական ծրագրի այն շրջանավարտները, ովքեր ստացել են մանկավարժի լրացուցիչ որակավորում և ամփոփիչ ատեստավորման քննությունից ստացել են 13 և բարձր միավոր, իսկ նրանց դիպլոմի հավելվածում գրանցված առարկաների միջին որակական գնահատականը (ՄՈԳ-ը) կազմում է առնվազն 13,

12. 2. ԵՊՀ ԻՄ մյուս տարիների կամայական մասնագիտության բակալավրի կրթական ծրագրի այն շրջանավարտները, ովքեր ստացել են մանկավարժի որակավորում և ամփոփիչ ատեստավորման քննությունից ստացել են 13 և բարձր միավոր, իսկ նրանց դիպլոմի հավելվածում գրանցված առարկաների ՄՈԳ-ը կազմում է առնվազն 13,

12.3. Այլ բուհերի «Նախադպրոցական մանկավարժություն», «Ընդհանուր մանկավարժություն» և «Մասնագիտական մանկավարժություն» մասնագիտությունների բակալավրիատի առկա և հեռակա ուսուցման ձևերի վերջին երեք տարվա շրջանավարտները, ովքեր ավարտական աշխատանքի պաշտպանությունից և ամփոփիչ

ատեստավորման քննությունից ստացել են 13 և բարձր միավոր, իսկ նրանց դիպլոմի հավելվածում գրանցված առարկաների ՄՈԳ-ը կազմում է առնվազն 13,

12. 4. Տավուշի և հարակից մարզերի դպրոցների այն ուսուցիչները, ովքեր ունեն առնվազն 5 տարվա մանկավարժական փորձ,

12. 5. ՀՀ զինված ուժերում պարտադիր զինվորական ծառայություն անցած և վերջին երեք տարվա ընթացքում զորացրված՝ սույն կարգի 12. 3. կետում նշված մասնագիտությունների դիմորդները:

13. «Նախադպրոցական մանկավարժություն», «Ընդհանուր մանկավարժություն» և «Մասնագիտական մանկավարժություն» մասնագիտությունների բակալավրի կրթական ծրագրի 13-ից ցածր ՄՈԳ ունեցող և այլ ծրագրերի շրջանավարտների, ինչպես նաև ՀՀ Ազգային բանակում ծառայած և երեք տարուց ավելի վաղ զորացրված դիմորդների ընդունելությունը կատարվում է մրցութային հիմունքներով՝ «Մասնագիտական մանկավարժություն» մասնագիտության բակալավրի կրթական ծրագրի վերջնարդյունքներին համապատասխան հարցաշարով անցկացված քննության արդյունքների հիման վրա:

14. Ընդունելության քննությունը անցկացվելու է ընթացիկ տարվա հոկտեմբերի 14-16-ը:

15. Ընդունելության վերաբերյալ որոշումը կայացնում է ընդունող հանձնաժողովը՝ հիմք ընդունելով առարկայական քննական հանձնաժողովի և մանդատային հանձնաժողովի ներկայացրած արձանագրությունները:

16. Մագիստրատուրա ընդունված դիմորդները պարտավոր են մինչև ընթացիկ տարվա նոյեմբերի 2-ը վճարել ուսման վարձավճարը, որից հետո կատարվում է նրանց հրամանագրումը: